

## PJESA II

### Jeronim de Rada Këngët e Milosaos (Kënga XIII)

#### Valle\*

Meqë, zot, do të na lësh,  
vafsh si një yll që dritën  
nuk e bjerr<sup>1</sup> udhës së tij.  
Bir, me helm të ritë<sup>2</sup> e tu  
mos qoftë përzier.  
Atë dit' që të na vish,  
qoftë i butë dimëri,  
me ullinj edhe me qumësht.  
Dhe bija të bëshme  
mëmat më martofshin shumë  
me djema të zgjedhur.  
Të na vish si nga larg vijnë  
fjalët e të dashurve,  
si mespërmes fletëve  
të ides<sup>3</sup> që kam te dera,  
duket më të aguar Shenjëza  
e më gëzon zemrën.  
Era e lehtë që tund fletët,  
gjumin njerëzve u letoftë<sup>4</sup>  
ndaj të gdhiri,  
edhe unë i vihëm punës,  
që të rrit fëmijët.  
Sjellsh ti një ushtëri fatmirë  
të na i hapë këto brigje  
lirisë që borëm<sup>5</sup>.

*Teksti është përshtatur në gjuhën e sotme nga prof. Dhimiter Shuteriqi.*

*\*De Rada e quan këngën XIII "valle". Nëna e Milosaos, Zonja e Madhe, i flet të birit, ndërkohë që gjithë fshati ka dalë për ta përcjellë.*

---

1. bjerr: humb

2 të ritë: rinia

3. ide: xinxife, hide, kimça

4. u letoftë: ua bëftë gjumin e lehtë, ua lehtësoftë

5. borëm: humbëm